

Կ Ա Ր Ծ Ի Ք

Արինե Տարոնի Ստեփանյանի <<Զբաղվածության կարգավորման հիմնախնդիրները ՀՀ-ում>> թեմայով Ը.00.02 - <<Տնտեսության, նրա ոլորտների տնտեսագիտություն և կառավարում>> մասնագիտությամբ տնտեսագիտության թեկնածուի գիտական աստիճանի հայցման ատենախոսության վերաբերյալ

Զբաղվածությունը մարդկանց աշխատանքային գործունեության հիմքն է, որը բերում է աշխատանքային եկամուտ, ապահովում է բնակչության անձնական ու հասարակական պահանջմունքների բավարարումը: Բնակչության կենսամակարդակը, կրթությունը, ընտանիքի սոցիալ-տնտեսական վիճակը կախված է զբաղված լինելուց: Զբաղվածության մակարդակի բարձրացումը նպաստում է տնտեսական աճին, նվազեցնում գործազրկությունը:

Զբաղվածությունը նաև մակրոտնտեսական կարևոր ցուցանիշներից մեկն է, այն ունի հստակ արտահայտված սոցիալական բնույթ, քանի որ արտահայտում է ոչ միայն մարդկանց պահանջմունքը եկամտների նկատմամբ, այլև հասարակայնորեն անհրաժեշտ աշխատանք կատարելու նրանց ցանկությունը: Վարձատրվող աշխատանք կատարելու մարդու ցանկությունը, օգտակար գործունեության այս կամ այն ոլորտի առաջնայնությունը, աշխատանքային մասնակցության չափը, մասնագիտության և աշխատատեղի ընտրությունը, աշխատանքային մոտիվացիան, բարձրարդյունավետ աշխատանք կատարելու և ունենալու շահագրգռվածությունը, այս բոլորը պայմանավորում են հասարակության մեջ մարդու սոցիալական կողմնորոշվածությունը:

Վերոնշյալներից էլ բխում է զբաղվածության կարգավորման անհրաժեշտությունը, որի հիմնախնդիրների վերլուծությանն էլ նվիրված է գրախոսվող ատենախոսությունը:

Ատենախոսության հիմնական նպատակ դնելով ՀՀ զբաղվածության մակարդակի համալիր վերլուծությունը և դրա վրա կարգավորիչ ազդեցության գործոնների գնահատման մեթոդաբանության մշակումը, հեղինակը աշխատանքում առաջադրել և

լուծել է ՀՀ աշխատանքի շուկայի հետագոտմամբ զբաղվածության կարգավորման տեսական հիմքերի և գործառույթների, ՀՀ-ում միջազգային փորձի կիրառման հնարավորությունների, զբաղվածության մակարդակի վրա ազդող գործոնների և ցուցանիշների փոխկապակցվածության, պետական կազավորման արդյունքների գնահատման, շահառուների սպասումների տեսանկյունից զբաղվածության կարգավորման արդյունավետության գնահատման մեթոդաբանության խնդիրները:

Ատենախոսության գիտական նորույթը կայանում է նրանում, որ ատենախոսը ՀՀ աշխատանքի շուկայի կառուցվածքային տեղաշարժերի գործոնային վերլուծություն կատարելով, առաջարկում է անհրաժեշտ վստահության աստիճանով ռեգրեսիոն մոդել, որտեղ ներկայացված է ՀՆԱ-ի փոփոխությունների վրա գյուղատնտեսության և առևտրի ոլորտներում կարգավորման ներգործությունը, ինչպես նաև զբաղվածության մակարդակի փոփոխությունները՝ դրամական տրանսֆերտներից, միջին աշխատավարձից, ներմուծման և արտահանման իրական ծավալներից կախված: Այնուհետև մշակվել է զբաղվածության պետական կարգավորման արդյունքների գնահատման մեթոդաբանություն, որը թույլ է տալիս առանձին ոլորտների և գործիքների կիրառման ազդեցությամբ ներկայացնելու բնակչության սոցիալ-տնտեսական լարվածության թուլացման ուղիները, ինչպես նաև շահառուների սպասումների հիման վրա առաջարկվել է զբաղվածության կարգավորման արդյունավետության գնահատման հայեցակարգ:

Անհրաժեշտ վստահության աստիճանով ռեգրեսիոն մոդելից ատենախոսը եզրահանգել է, որ գյուղատնտեսության ոլորտում զբաղվածների թվի 1% աճը կարող է հանգեցնել տվյալ տարվա ՀՆԱ-ի աճին 0.6 %-ով, իսկ առևտրի ոլորտում՝ 4,7%-ով:

Եզրակացություններում մանրամասն խոսվում է նաև արտերկրից դրամական փոխանցումների, ՀՆԱ-ի իրական ծավալների ինդեքսի, միջին ամսական աշխատավարձի, ներմուծման և արտահանման իրական ծավալների աճերի ազդեցությունը զբաղվածության վրա (էջ 126):

Եզրահանգումներ են արված նաև միջազգային փորձի ուսումնասիրման արդյունքներից և ՀՀ-ում դրանց հնարավոր կիրառման մասին (էջ 127, 128): Առաջարկվել է նաև զբաղվածության պետական կարգավորման արդյունավետությունը գնահատող ցուցանիշ (էջ 129):

Ատենախոսն ունի թվով 7 գիտական հոդվածներ, որոնցում գետեղված են ատենախոսության հիմնական դրույթներն ու արդյունքները:

Ատենախոսությունը գերծ չէ նաև թերություններից, որոնք հետևյալներն են:

1. Իչպես հայ տնտեսագիտական մտքի շատ դրսևորումներում, այս դեպքում էլ հստակ չէ նաև հեղինակի մոտեցումը՝ ասել աշխատանքի առաջարկ, թե աշխատուժի առաջարկ: Որպես ցայտուն օրինակ կարող է լինել էջ 80-ի գծապատկերը, որի վերևում գրված է աշխատանքի առաջարկը, իսկ գծանկարի ներսում՝ աշխատուժի առաջարկը: Պետք է ասել, որ փաստորեն նույնացվում են այդ երկու արտահայտությունները: Բայց հենց ինքը հեղինակը էջ 30-ում գրում է, որ «Աշխատուժը իր մեջ ներառում է զբաղվածներին և գործազուրկներին», բայց հետո շարունակում է ..«ովքեր ապահովում են աշխատուժի առաջարկը»»: Եթե ասում ենք ապրանքի առաջարկ, հասկանում ենք, որ շուկայում վաճառվում է այդ ապրանքը, բայց եթե ասում ենք աշխատուժի առաջարկ, նշանակում է մարդիկ, այսինքն զբաղվածները և գործազուրկներն են վաճառվում: Բայց 21-րդ դարում մարդկանց վաճառքը հանցանք է դիտվում: Կամ էջ 18-ի 2-րդ պարբերությունում ասվում է «աշխատանքի գինը», իսկ էջ 11-ի 2-րդ պարբերությունում՝ «աշխատուժի գինը», ի դեպ վերջինս հնարավոր է չափել միայն մարդկային կապիտալի արժեքը հաշվարկող բավականին բարդ բանաձևերով:

2. Ժամանակակից տնտեսագիտությունը տարբերում է 4 արտադրական գործոններ՝ աշխատանքը, ձեռնարկատիրական ձիրքը, կապիտալը և հողը: Իսկ

ատենախոսության հեղինակը էջ 10-ի 3-րդ պարբերությունում ասում է, որ <<...աշխատուժը արտադրական գործոնները մեկն է հանդիսանում...>>:

3. Էջ 125-ում, 2-րդ կետում բնութագրելով արդյունավետ զբաղվածության ցուցանիշները, ատենախոսը չի նշում ամենակարևորը, որ այն պետք է ապահովի արժանապատիվ եկամուտ և բարեկեցություն:

4. Աշխատանքում առկա են նաև անհասկանալի մտքեր: Էջ 11- 2-րդ պարբերության 3-րդ տողից սկսած ասվում է <<Որոշ գործատուներ, որոնք տնտեսական ճգնաժամի պատճառով ընկել են տնտեսական վատթար վիճակի մեջ, նույնպես կրճատում են աշխատատեղերի արժեքի կրճատումը...>>, ինչպես նաև տառասխալներ (էջ 4, 6, 23, 24, 127 և այլն):

Ե Ձ Ր Ա Կ Ա Ց ՈՒ Թ Յ ՈՒ Ն

Սակայն նշված թերությունները զգալիորեն չեն ազդում աշխատանքի վերջնական գնահատականի վրա:

Գրախոսվող ատենախոսությունն ավարտուն գիտական հետազոտություն է, որի հիմնական դրույթները և առաջարկությունները օգտակար կարող են լինել զբաղվածության քաղաքականություն մշակողների համար:

Ատենախոսի գիտական հրապարակումներն արտահայտում են հետազոտության հիմնական արդյունքները

Մեղմագիրն արտահայտում է ատենախոսության հիմնական դրույթները և դրա սեղմ շարադրանքն է:

Ատենախոսությունը համապատասխանում է ՀՀ ԲՈԿ-ի կողմից թեկնածուական ատենախոսություններին առաջադրվող պահանջներին, իսկ դրա հեղինակը Արինե Տարոնի Ստեփանյանն արժանի է Ը.00.02 -<<Տնտեսության, նրա ոլորտների

տնտեսագիտություն և կառավարում>> մասնագիտությամբ տնտեսագիտության
թեկնածուի գիտական աստիճանի շնորհմանը:

Պաշտոնական ընդդիմախոս, ԵՊՀ

Կառավարման և գործարարության ամբիոնի
պրոֆեսոր, տնտեսագիտության թեկնածու



Ա. Ա. Համբարձումյան

Ա. Հ. Համբարձումյանի ստորագրությունը հաստատում եմ:

ԵՊՀ գիտական քարտուղար,
բանասիրական գիտությունների թեկնածու

05.12.2022թ.



Մ. Ա. Հովհաննիսյան